

Na La Uvita, cu clima friu,

E mucha di Lagun a festeha su año cu vallenato cayente



Di R pa Dr. Sra. Milagro Harms; Alejandro Corredor cantante; Oscar Cetina, acordeonista; e autor cumpleañosero; Carlos Acevedo, raspa; Fabián Sanchez, director y tocado di tambor. Nota e computer conecta cu Aruba caminda famia Romero ta celebra en bibo via Skype.

Invita pa nos amigonan Alfonso y Chelo, mi señora y ami siman pasa a celebra mi 84 año cu nan na e pueblo La Uvita, Departamento Boyaca. La Uvita ta un pueblo chikito cu un poblacion di apenas 3,300.

E ta keda na un haltura di 2,400 meter loke ta duna un clima manera esun di Bogota, basta friu den dia y mas friu di nochi.

Manera un compensacion pa e clima friu y duro, e Boyacensesnan ta muestra un caracter calido y hospitalario. Nos amigonan Alfonso y Chelo no ta un excepcion; al contrario, nan a bay "out of their way" pa haci e celebracion di mi año inolvidabel. "Clyde", nan a bisa mi, "despues cu bo a sobrevivi e operacion di curason, bo merece un celebracion extraordinario".

Nan a regla pa tres dia di celebracion, cuminsando cu un fiesta di sorpresa dos dia prome cu mi fecha di nacimiento. Pa e paranda akinan a bisa mi cu nan a invita algun amigo intimo pa un barbecue riba e teras di nan cas. Loke nan no a bisa mi ta cu nan a invita un banda di vallenato tambe.

Despues cu nos a tuma algun trago, Alfonso a blinda mi señora y ami bisando nos pa no preocupa pasobra nada ta bay

pasa cu nos. Algun momento despues a rezona casi pa haci nos sordo e prome notanan di "Cumpleaños Feliz" toca den ritmo di vallenato. Ora cu nos a kita nos blinda y nos amigonan a bin duna mi pa-bien, mi a haya un krop den mi garganta y mi wowonan a yena cu lagrima. Esaki tabata un sorpresa grandi y emotivo. Un experiencia inolvidabel!

Entre tanto, nos amigonan na Aruba, Maya (ruman di Chelo) y su casa Benjamin Romero y famia, kendenan si tabata na haltura di e sorpresa, a conecta via Skype y tambe tabata disfruta di e fiesta. Cu glas di biña den man nan a join e canto y asina haci e celebracion un evento internacional di berdad.

E banda "La Nueva Generación de Vallenato" ta consisti di apenas cuatro musico hoben, pero nan tabata toca cu hopi zjeito y tur hende tabata balia sin cansa.

Fabián Sanchez, (21) director y tocado di tambor ta e miembro mas bieu, sigui pa e cantante Alejandro Corredor cu tin 17año y Carlos Acevedo, raspa, cu 16 año. Oscar Cetina, e acordeonista, ta e mas hoben cu solamente 14 año, pero e ta toca e acordeon manera Israel Romero di Binomio de Oro.

Entre tanto, Alfonso a prepara un barbecue sabroso di

lomito, pincho di galiña cu el a sirbi compaña cu "ahogado" (un salsa típico), patacon, salada cu guacamole y batata

hasa. Un di e huespednan a trece un bolo cu a inspira e banda pa toca "Cumpleaños Feliz" atrobe y tur presente

a canta ora mi a paga e bela simbolico di e 84 cu mi a cumpli. clydeharmis@yahoo.com. □